

四庫全書

子部

欽定四庫全書

子部

羣書考索後集卷六十九

詳校官中書_臣竇汝翼

主事_臣祁韻士覆勘

總校官知縣_臣楊懋珩

校對官中書_臣徐步雲

謄錄監生_臣任銜萱

欽定四庫全書

羣書考索後集卷五十九

宋 章如愚 編

財用門

銅錢

東晉元帝過江用孫氏赤烏舊錢輕重雜行大者謂之
北輪中者謂之四文吳興沈充又鑄小錢謂之沈郎錢
錢既不多由是稍貴

武帝太元三年詔曰錢國之重寶小人貪利銷壞無已
監司當以為意廣州夷人寶貴銅鼓而州境素不出銅
聞官私賈人皆貪北輪錢斤兩差重以入廣州貨夷人
鑄敗作鼓其重為制得者科罪

安帝元興中桓元輔政立議欲廢錢用爰帛孔琳之議
曰救弊之術無取於廢錢朝議多同琳之故元議不行
宋文帝元嘉七年立錢置法鑄四銖文曰四銖重如其
文人間頗盜鑄多剪鑿古錢取銅帝甚患之錄尚書王

義恭建議以大錢當兩以防穿鑿議者多同之右僕射何尚之議曰夫泉貝之興以估貨為本事在交易豈假多數數少則幣輕數多則物重多少雖異濟用不殊况復以一當兩徒崇虛價者也沈演之謂若以大錢當兩則國傳難朽之寶家贏一陪之利不俟刑憲巧緣自絕上從演之議遂以一錢當兩行之經時公私非便乃罷時言事者多以錢貨減少國用不足欲禁私銅以充官鑄五銖 范泰又陳曰夫貨存貿易不在多少昔日之

貴今日之賤其揆一也伏願思可久之道贖欲速之情則嘉謨日陳而聖慮可廣先是元嘉中鑄四銖錢輪郭形制與古五銖同價無利百姓不資盜鑄元嘉二十五年罷當兩大錢

孝武孝建初鑄四銖文曰孝建一邊為四銖其後稍去四銖專為孝建三年右丞徐爰議曰貨薄人貧公私俱罄今宜以銅贖刑隨罪為品詔可之所鑄錢形式薄小輪郭不成就于是人間盜鑄者雲起雜以鉛錫並不牢

固又翦鑿古錢以取其銅乃立品格薄小無輪郭者悉加禁斷時議者又以銅轉難得欲鑄二銖錢顏峻上三不可之論上不聽

廢帝景和二年鑄二銖錢文曰景和形式轉細官錢每出人間即模效之而大小厚薄皆不及也無輪郭不磨翦鑿者謂之來子尤薄者謂之符葉市井通用之 永光元年沈慶之啟通私鑄由是錢貨亂改一千錢長不盈三寸大小稱此謂之鵝眼錢劣於此者謂之絰環錢

入水不沉隨手破碎市者不復斷數十萬錢不盈一掬
斗米一萬商旅不行

明帝泰始初唯禁鵝眼綖環其餘皆通用復禁人鑄官
署亦廢工尋又普斷唯用古錢

齊高帝建元四年孔覲上書曰鑄錢之弊在輕重屢變
嚴法不禁者由上鑄錢惜銅愛工也自漢鑄五銖錢至
宋文帝四百餘年制度有廢興而不變五銖者其輕重
可法得貨之宜以為開置錢府大興鎔鑄錢重五銖一

依漢法使嚴斷翦鑿小輕破缺無周郭者悉不得行官錢細小者稱合銖兩錢貨既均遠近若一時議者以為錢貨轉少宜更廣鑄重其銖兩以防人姦上乃使諸州大市銅會上崩乃止

武帝時竟陵王子良上表曰頃錢貴物賤殆欲兼倍凡在觸類莫不如茲稼穡艱劬斛直數十機杼勤苦足纔三百所以然者實亦有由東間錢多翦鑿鮮復完者公家所愛必須圓大以兩代一困於無所鞭捶質繫益致無聊

漢初京師三吳荆郢江襄梁益用錢其餘州郡則雜以穀帛交易交廣之域則全以金銀為貨

武帝乃鑄錢肉好周郭文曰五銖重四銖三參二黍又別鑄除其肉郭謂之公式女錢徑一寸文曰五銖重如私鑄五銖二品並行百姓或私以古錢交易者其五銖徑一寸一分重八銖文曰五銖二吳屬縣行之公式女錢徑一寸重五銖無輪郭郡縣皆通用太平百錢二種並徑一寸重四銖源流本一但文字古今之殊耳文並

曰太平百錢定平一百五銖徑六分重一銖半文曰定平一稚錢五銖徑一寸半重四銖文曰五銖源出于五銖但狹小東境謂之稚錢五銖錢徑七分半重三銖半文曰五朱源出於雜錢但稍遷異以銖為朱耳二吳行之差少於餘錢又有對文錢其源未聞豐貨錢竟一寸重四銖半代謂之富錢藏之令人富也布泉錢一寸重四銖半代謂之男錢云婦人佩之即生男也此等輕重不一天子頻下詔書非新鑄二種之錢並不許用而趨

利之徒私用轉甚至普通中乃議盡罷銅錢更鑄鐵錢人以鐵錢易得並皆私鑄

梁敬帝太平元年詔雜用古今錢 太平二年鑄四柱

錢一當二十後改四柱錢一當十景申復用細錢

南史

陳初承梁喪亂之後鐵錢不行始梁末又有兩柱錢及鵝眼錢于時人雜用其價同但兩柱重而鵝眼輕私家多鎔鑄又間以錫錢兼以粟帛為貨

高祖永定元年四月鑄四柱錢一當二十壬辰改四柱

錢丙申復閉細錢

通鑑

文帝大嘉五年改鑄五銖初出一當鵝眼十

南史

宣帝大建十一年又鑄大貨六銖以一當五銖之十與五銖並行后還當一帝崩遂廢六銖而行五銖竟至陳亡其嶺南諸州多以鹽米布交易俱不用錢

後魏初至太和錢貨無所用 孝文帝始詔天下用錢十九年公鑄粗備文曰太和五銖詔京師及諸州鎮皆通行之內外百官祿皆准絹給錢足為錢二百在所

遣錢工備爐冶人有欲鑄聽就鑄之

宣武帝永平三年冬又鑄五銖錢京師及諸州鎮或不
用或有止用古錢不行新鑄商賈不通貿易頗隔

孝明帝熙平初王澄上言謂今之太和與新鑄五銖及
諸古錢方俗所使用者雖有小大之異並得通行貴錢
之差自依鄉價庶貨環海內公私無壅詔曰錢行已久
且可依舊又奏請並下諸方州鎮其太和及新鑄斤古
錢内外全好者不限大小悉聽行之雖眼環鑿依律而

禁惟太和五銖二錢得用公造新者其餘雜種一用古錢生新之類普同禁約諸方之錢通用京師其聽依舊之處與太和錢及新造五銖並行若盜鑄錢者罪重常憲詔從之而河北諸州舊少錢貨猶以他物交易錢畧不入于市三年崔亮奏謹按鑄錢方興用銅處廣既有治利並宜開鑄詔從之自後所行之錢人多私鑄錢稍小薄價用彌賤初建重制盜鑄之禁開科貴之格孝莊帝初私鑄者益更薄小乃至風飄水浮米斗幾直

一千楊侃奏曰及頃在雍州亦表陳其事聽人與官並鑄五銖錢帝從之乃鑄五銖錢高恭之又奏曰今錢徒有五銖之文而無二銖之實薄甚榆莢上貫便破置之水上始欲不沉論今據古宜改鑄大錢文載年號以記其始則一斤所成七十六文銅價至賤五十有餘其中人功食料錫炭鉛沙直置無利應自息心况復嚴刑廣設以臣測之必當錢貨永通公私獲允後遂用楊侃計永安二年詔更鑄文曰永安五銖錢官自立鑪亦聽人就

鑄盜鑄彌衆時高謙之上表求鑄三銖錢且政興不以
錢大政衰不以錢小唯貴公私得所自今此鑄以濟交乏
五銖之錢任使並用國得其益詔將從之事未就會卒
北齊 神武霸政之初猶用永安五銖遷鄴已後百姓
私鑄體制漸別遂各以為名有雍州青赤梁州生厚緊
錢古錢河陽生濫天柱赤牽之稱冀州之北錢皆不行
交貿者皆以絹布 神武乃收境內之銅及錢仍依舊
文更鑄流之四境未幾復細薄姦偽競起 武定六年

文襄王以錢文五銖名須稱實宜秤錢一文重五銖者聽入市天下州鎮郡縣之市各置二秤懸於市門私人所用之秤皆準市秤以定重輕凡有私鑄悉不禁斷或雖重五銖而多雜錫鐵並不聽用

文帝天保四年受魏禪除永安之錢改鑄常平五銖重如其文其錢甚貴而制造甚精其錢未行私鑄已興一二年間即有濫惡至乾明皇建之間往往私鑄鄴中用錢有赤郭青熟細眉赤生之異河南所用有青薄鈔錫

之別青徐齊兗梁荆河等州輩類各殊武平以後私鑄
轉甚或以生鐵和銅至于齊亡卒不能禁後周之初尚
用魏錢及武帝保定元年乃更鑄布泉之錢以一當
五與五銖並行時梁益之境又雜用古錢交易河西諸
郡或用西域金銀之錢而官不禁

漢書西域傳罽賓國以銀為錢丈為騎馬

幕為人面幕即幔也烏弋山雞國之錢與罽賓國同丈
為人頭幕為騎馬加金銀飾其及安息亦以銀為錢丈
為王面幕為夫人面王死即更鑄大月氏亦同

建德二年更鑄五行大布錢以一當十夫收商賈之利

與布泉錢並行 四年又以邊境之錢人多盜鑄乃禁
五行大布不得出入四關布泉之錢聽入而不聽出
五年以布泉漸賤而人不用遂廢之

宣帝大成元年又鑄永通萬國錢以一當千與五行大
布五銖凡三品並用

隋文帝開皇元年以天下錢貨輕重不一乃更鑄新錢
背面肉好皆有周郭文曰五銖而重如其文 三年詔
四面諸關各付百錢為樣從關外來勘樣相似然後得

過樣不同者則壞以為銅入官詔行新錢以後前代舊錢有五行大布永通萬國及齊常平所在勿用以其貨易不止 四年詔仍舊不禁者縣令奪半年祿然百姓習用既久猶不能絕 五年詔又嚴其制自是錢貨始一所在流布百姓便之是時見用之錢皆湏和以錫鑠錫鑠既賤求利者多私鑄之錢不可禁約其年詔乃禁出錫鑠之處不得私有采取 十年詔晉王廣聽於揚州立五爐鑄錢其後奸狡稍多鑿磨鑪錢郭取銅私鑄

又難以鉛錫遞相倣倣錢遂輕薄乃下惡錢之禁 十
八年詔漢王諒聽於并州立五爐鑄錢又江南人間錢
少晉王廣又請於鄂州白茅山有銅鑛處鑄錢於是詔
聽置十爐鑄錢又詔蜀王秀於益州立五爐鑄錢是時
錢益濫惡乃令有司檢天下邸肆見錢非官鑄者皆毀
之其銅入官而京師以惡錢易貿為吏所執有死者數
年之間私鑄頗息 大業已後王綱弛紊巨奸大猾遂
多私鑄錢轉薄惡或剪鐵鏃裁皮糊紙以為錢相雜用

之貨賤物貴以至於亡

以上並
通典

唐高祖入長安民間行綫環錢凡八九萬纔滿半斛

武德四年廢五銖錢鑄開元通寶錢徑八分重二銖四

三積十年重一兩得輕重大小之中其錢文給事中歐

陽詢書字合八分及篆隸三體詢初進蠟樣入文德皇

后恰一甲跡故錢上有恰文洛并幽益桂等州皆置場賜

秦王齊王三爐右僕射裴寂一鑪以鑄盜鑄者沒其家

其後盜鑄漸起

唐志

顯應五年以惡錢多官為市之以

一善錢售五惡錢 其年又改以好錢一文易惡錢兩

文

唐志

乾封元年造乾封泉寶錢徑一寸重二銖六分

以一當舊錢之十踰年而舊錢並廢明年以商賈不通

米帛踴貴復行開元通寶錢天下皆鑄之犯法日蕃有

以舟筏鑄江中者

唐志

乾封二年詔開元錢依舊施行

乾封錢則之

通典

儀鳳四年命東都糴米粟斗別納惡錢百少府司農毀之是時鑄多錢賤米粟踴貴乃罷少府鑄錢尋而復舊

唐志

永淳元年私鑄者抵死鄰保里坊村正皆從坐

唐志

武后時長安中又降勅又令懸樣於市令百姓依樣用錢俄又揀擇艱難交易留滯非穿穴及鐵錫銅液皆得用之熟銅排斗沙澁之錢皆售自是盜鑄蜂起江淮游民依大山陂海以鑄吏莫能捕神龍先天之際兩京用錢益濫柳衡錢纔有輪郭鐵錫五銖之屬皆可用之或鎔錫模錢須臾百十

唐志

睿宗先天元年京師用錢惡貨物踴貴諫議楊虛受上

疏伏見市井用錢不勝濫惡有加鐵錫即非公鑄銅錫
亂雜偽錢豐多商賈積滯富家藏鑄公錢未益於時須
禁法不當於代要其惡錢自望官為博取納鑄錢州京
城並以好錢為用書奏不行

玄宗開元初宰相宋璟請禁惡錢行二銖四銖錢毀舊
錢不可用者江淮有官鑄錢偏鑄錢稜錢時錢掌監察
御史蕭隱之使江淮率戶出惡錢捕責甚峻上青錢皆
輸官小惡者沉江湖市井不通物價益貴隱之坐貶官

唐志

開元六年勅禁斷惡錢行三銖四分以上舊錢更

收人間惡錢鎔破復鑄准樣式錢勅出之後百姓喧然
物價搖動商人不敢交易宰相宋璟蘓頌奏請出大府
錢萬貫分於南北兩市平價買百姓間所賣之物堪貯
庫宮湏者庶得好錢散行人間從之

會要

又降勅近斷

惡錢恐人間少錢行用其兩京文武官夏季防閑庶僕

宜即先給錢待後季催取所配物貨賣准數還官

會要

七年宋璟又請出米十萬斛收惡錢少府毀之

唐志

十

一年詔所在加鑄禁賣銅錫及造銅器者

唐志

十八年

勅以人間多盜鑄錢始禁私賣銅鉛錫及以銅為器皿

其米銅鉛錫者官為市取

通鑑

二十年千錢以重六斤

四兩為率每錢重三銖四參禁缺頓沙澁盪染白強黑

強之錢首者官為市之

唐志

二十二年宰相張九齡建

議古者以布帛菽粟不可尺寸杪勺而均乃為錢以通

貨易官鑄所入無幾兩工費多宜縱民鑄議下百官宰

相裴耀卿黃門侍郎李林甫河南少尹蕭晁秘書監崔

沔皆以嚴斷惡錢則人知禁稅銅折役則官冶可成計
估度庸則私錢以利薄而自息若許私鑄則下皆棄農
而競利矣時劉秩亦有五不可四美之說於是詔禁惡
錢 二十六年宣潤等州初置錢監兩京用錢稍善米
粟價益下其後錢又漸惡詔出銅所在置監鑄開元通
寶錢京師庫藏皆滿天下盜鑄益起廣陵丹陽宣城尤
甚江淮偏鑄錢數十種雜以鐵錫輕漫無復錢形公鑄
者號官爐錢一以當偏爐錢七八富商往往藏之以易

江淮私鑄者兩京錢有鵝眼古文錢環之別每貫重不過三四斤至剪鐵而縑之宰相李林甫請出絹布三百萬疋平估收錢侍郎楊國忠招權市恩明日詔復行舊

錢

唐志

天寶十一載又出錢三十萬緡易兩市惡錢國

忠又言錢非鐵錫銅沙穿穴古文皆得用之韋倫請厚價募士繇是役用減而鼓鑄多天下鑪九十九絳州三十楊潤宣鄂蔚皆十益郴皆五洋州三定州一每鑪歲鑄錢三千三百緡

唐志

肅宗乾元元年經費不給鑄錢使第五琦鑄乾元重寶錢徑一寸每緡重十斤與開元通寶參用以一當十亦號乾元十當錢先是諸鑪鑄錢窳薄鎔破錢及佛像謂之盤陀皆鑄為私錢犯者杖死第五琦為相復命絳州諸鑪鑄重輪乾元錢徑一寸二分其文亦曰乾元重寶背之外郭為重輪每緡重十二斤與開元通寶錢並行以一當五十是時民間行三錢大而重稜者亦號重稜錢法既屢易物價騰踴米斗錢至七千餓死者滿道初

有虛錢京師人人私鑄併小錢壞鍾像犯禁者愈衆鄭叔清為京兆尹數月榜死者八百餘人肅宗以新錢不便命百官集議不能改上元元年減重輪錢以一當三十開元舊錢與乾元十當錢皆以一當十碾礱鬻受得為實錢虛錢交易皆用十當錢由是錢有虛實之名史思明據東都亦鑄得一元實錢徑一寸四分以一當開元通寶之百既而惡得一非長祚之兆改其文曰順天元寶

肅宗寶應元年其開元乾元重較錢並宜準一文用不須計以虛數

代宗即位乾元重寶錢以一當二重輪錢以一當三而大小錢皆以一當一自第五琦更錢犯法者日數百州縣不能禁止至是民甚便之其後民間乾元重稜二錢鑄為器不復出矣

唐志

劉晏以江嶺諸州任土所出皆重

粗賤弱之貨輸京師不足以供道路之直於是積之江淮易銅鉛薪炭廣鑄錢歲得十餘萬緡輸京師及荆揚

二州自是錢日增矣

唐志

代宗大歷七年禁天下銅器

德宗建中元年戶部侍郎韓洄以商州紅崖產銅多請

復洛源廢監起十鑪歲鑄錢七萬二千緡德宗從之

唐志

建中二年鹽鐵使包佶奏江淮百姓近日市肆交易

錢交下粗惡訪聞諸州山野地窖皆有私錢轉相貨易

姦濫漸深今後委本道觀察使明立賞罰切加禁斷

會要

建中四年判度支趙贊採蓮州白銅鑄大錢一當十

以權輕重

唐志

貞元九年張滂奏諸州府公私諸邑鑄

造銅器雜物等伏請準從前勅文除鑄鏡外一切禁斷

會要

貞元十年詔天下鑄銅每器一斤其直不得過百

六十銷錢者以盜鑄論然而民間錢益少繒帛價輕州

縣禁錢不出境觀察使李若初請通錢往來而京師商

賈齎錢四方貿易者不可勝計詔復禁之

唐志

貞元十

四年鹽鐵使李若初奏道府多以近日泉貨數少繒帛

價輕禁止見錢不令出界置使課利有闕商賈不通請

所有見錢任其往來勿使禁止從之

會要

貞元二十年命

市井交易以綾羅絹布雜貨與錢兼用

憲宗以錢少復禁用銅器時商賈至京師委錢諸道進

奏院及諸軍諸使富家以輕裝趨四方合券乃取之號

飛錢

元和元年禁銅物

會要

二年禁鉛錫錢

會要

三

年鹽鐵使李巽以郴州平陽銅坑二百八十餘復置桂

陽監日鑄錢二十萬天下歲鑄錢十三萬五千緡

唐志

四年京師用錢緡少二十及有鉛錫錢者捕之非交易

而錢行衢路者不間復詔採五嶺銀坑禁錢出嶺

唐志

元和六年節度使王錡置鑪䟽拒馬河水鑄錢工費尤

省以刺史李聽為使以五鑪鑄每鑪月鑄錢三十萬由

是河東錫錢皆廢

唐志

元和七年尚書王紹度支盧坦

鹽鐵使王播等奏伏以京都時用多重見錢官中支計

近日殊少蓋緣比來不許商人便換因茲家有滯藏所

以物價轉輕錢多不出今商量伏請令商人於戶部度

支鹽鐵三司任便換見錢一切依舊禁約從之

會要

元

和十二年復給京兆府錢五十萬緡市布帛而富家錢過五十貫者死王公重貶沒入於官以五之一賞告者京師區肆所積皆方鎮錢少亦五十萬緡乃爭市第宅然富貴倚左右神策軍官錢為名府縣不敢劾問敬

宗寶歷初河南尹王起請銷錢為佛像者以盜鑄錢論

唐志

文宗太和三年詔佛像以鉛錫土木為之飾帶以金銀鍮石烏油藍鐵唯鑑磬釘環鈕得用銅餘皆禁之盜鑄

者死

唐志

太和四年詔積錢以七千緡為率十萬緡者

期以一年出之二十萬以二年凡交易百緡以上者足

帛米粟居半河南府揚州江陵府以都會劇約束如京

師未幾皆罷

唐志

太和八年河東錫錢復起鹽鐵使王

涯置飛狐鑄錢院於蔚州天下歲鑄錢不及十萬緡文

宗病幣輕錢重時雖禁銅為器而江淮嶺南列肆鬻之

千錢為器射利數倍宰相李珣請加鑪鑄錢於是禁銅

器官一切為市之

唐志

武宗廢浮屠法永平監官李郁彥請以銅像鐘磬鑪鐸
皆歸巡院州縣銅益多益鹽鐵使以工有常力不足以
加鑄許諸道觀察使皆得置錢坊淮南節度使李紳請
天下以州名鑄錢京師為京錢大小徑寸如開元通寶
交易禁用舊錢會宣宗即位盡黜會昌之政

上並
唐志

初鑄錢有七監武宗會昌中增置八監每道置鑄坊
一太中初二監廢

五代晉高祖勅聽公私自鑄銅錢毋得雜以鉛錫每十

錢重一兩以天福元寶為文

欽定四庫全書

才甫先生集
卷五十九

三

羣書考索後集卷五十九

欽定四庫全書

羣書考索後集卷六十

宋 章如愚 編

財用門

銅錢類

宋朝國初平江南歲鑄錢七萬貫自後稍增廣太宗至
道中歲八十萬貫真宗景德末一百八十三萬貫天禧
末一百五萬貫

祥符後坑
多不發也

仁宗天聖中歲鑄一百餘萬

貫慶厯中三百萬貫神宗熙寧以後歲鑄銅錢共六百

餘萬貫

出類苑

宋朝鑄錢之目國初歲鑄緡錢三百二十萬東南則二百五十萬神宗元豐增至五百萬出東南者三百八十八萬神宗熙寧以後漸虧其舊銅窟消耗苗脉不興乃始侵鐵為銅謂之膽銅今日則歲僅十五萬緡

宋朝東南鑄錢之監江州有廣寧監

咸平三年置額二十萬 紹興

寄役

池州有永豐監

至道三年置額四十萬 紹興寄贛州

建州

有豐國監

咸平三年置
額二十萬

韶州有永通監

景德八年置
額四十八萬

會要內
云十萬

以至監絳州之典錢

十三萬
大錢

衛州之黎

陽

熙寧七年置
額三萬七緡

與夫衡州之監亭

十五萬

睦州之神

泉

十五萬

熙寧八年以神泉為名

宋朝設監之所又有永平監

在饒州唐肅宗乾元
初置額四十五萬

阜

民監

在惠州

保興監

在杭州

鑄錢院

在虔州大觀四年
置紹興勅廣寧

及永豐二
監寄此

亦設監之所

太宗至道二年冬十月詔以池州新鑄錢監為永豐監
先是饒州有永平監兵匠多而銅錫不給知州馬亮請
分其工之半別置鹽於池州詔從之於是歲增鑄上數十

萬

長編

太平興國二年初李煜舊用鐵錢於民不便樊

若水請置監於昇鄂饒等州大鑄銅錢見山之出銅者
悉禁民採並取以給官鑄諸州官所則銅錢盡發以市
金帛輕貨上供及博糴麥銅錢既不渡江益以新錢民
間錢愈多鐵錢自當不用悉鑄為農器以給江北流民

之歸附者且除銅錢過江之禁詔從其便民甚便之

長編

太平興國八年張齊賢初除轉運使辭曰上面命曰江
左初平民間不便事一一條奏齊賢曰臣聞江左舊以
鐵為幣今改用銅錢民間難得而官責課頗受鞭撻此
最不便上曰漢時吳王即山鑄錢江南多出銅為朕密
經營之初李氏歲鑄六萬貫自克復增咨匠然不過七
萬貫常患銅及鉛錫之不給齊賢乃訪得江南承旨丁
釗歷指饒信虔州山谷產銅鉛錫之所又求前代鑄法

惟饒州永平監用唐開元錢料堅實可久由是定取其法歲鑄三十萬貫即詣闕面陳其事詔可之然唐永平錢法肉好周郭精妙齊賢所鑄雖增數倍而稍為粗惡矣

長編

真宗咸平三年五月先是宰相張齊賢上言今之所患錢貨未至多望擇使臣往逐處相度漆價又招誘人戶淘採鉛錫仍按行銅山易得薪炭處置監鑄錢如此二年間可得百五十萬貫即遣虞部員外郎馮亮

未見內供

奉官白承睿往幹其事庚申亮等言饒池江建州歲鑄錢百三十五萬貫銅鉛皆有餘羨乃以亮為江南轉運副使兼都大提點江南福建路鑄錢事承睿同提點焉

長編

祥符九年李溥言饒池江杭四州錢監每歲共鑄

錢一百二十萬貫用銅四百五十三萬斤四監及產銅州軍見管銅共一百五十二萬一千二百餘斤又信州陰山等處銅坑自咸平初興發商旅競集官場歲五六百萬斤採取既多其後止二三百萬斤望酌中定額

上曰嘗記咸平中陳恕以江南銅多請官少市未幾銅鑛漸少迄今常若不豐天地所有皆貴濟用豈人心可料其增損耶

長編

天禧五年錢弊之制有銅鐵二等凡

鑄銅錢有四監饒州曰永平池州曰永豐江州曰廣寧建寧府曰豐國至道中歲鑄八十萬貫景德末至一百八十三萬貫大中祥符後銅坑多不發天禧末鑄一百

五萬貫

後編

神宗熙寧五年丁卯內藏庫言勘會饒池江建等州通

年額鑄錢一百五萬貫并額外增剩錢久來並納內藏庫每年却退錢六十萬貫并三年一次支南郊錢一百萬貫赴三司顯見往復欲乞下三司自今年額鑄錢一百五萬貫內支一十一萬六千六百六十六貫六百六十七文并饒池江建州監鑄到額外剩錢並納本庫外餘錢並令左藏庫受更不令本庫逐年退錢六十萬貫并每次南郊支錢一百萬貫與三司仍乞減放兵上庫插子節級共三十人歸左藏庫每日只輪差軍插子三

人赴庫如遇諸處支納錢實據合使人數邊旋於左藏庫計會勾喚從之

長編

熙寧七年廣東轉運司言韶州

永通阜民二監歲鑄錢八十萬此又增鑄錢三十萬近有旨改鑄折二錢一歲比小錢可增二十萬欲乞以所募舟運至發運司改兌小錢入京以為軍國之計上批惠州阜民錢監治平四年置所鑄錢係內藏歲額止前年移撥與轉運司買銅今既有羨餘宜復歸內藏

徽宗崇寧三年十二月復置阜民監熙寧間始置元祐

元年罷於是從提舉廣東常平兼措置韶州鑄錢王覺

奏請復之

長編

崇寧五年戶部狀近契勘江池饒建州錢

監各有拖欠下未鑄戶部無額上供錢萬數浩瀚雖累牒逐州鑄錢司轉運發運司等處催促終不見補鑄起發契勘在京支費浩大自今急闕見錢已借用朝廷封樁錢接助支遣拖下未鑄小平錢共二百一十八萬餘貫令工部案劾施行從之

長編

崇寧五年中書省勘會

諸路歲收銅數及鑄錢合用銅數下項一每年約收諸

色銅六百六十餘萬斤舊銅錫約收四百六十餘萬斤
膽銅約收一百萬斤碓銅約收七十萬斤碓銅係冶料
淘尋不常有新銅錫約收三十餘萬斤一諸路十監每年
共鑄錢二百八十萬貫合要銅一千一十一萬五千斤
內建州錢監本路自有銅外逐年合要銅九百六十三
萬五千斤一錢監合用銅除上供錢已得足備外其餘
錢監闕少銅三百三萬五千斤一錢監去處所鑄錢數
共二百八十九萬四百貫江州廣寧

二十四萬貫

池州永豐

三十四萬萬 饒州永平四十六萬 建州豐國二十四萬 係
五千貫

鑄上供錢共一百三十三萬四百貫衡州監亭三十萬貫 舒

州國安一十萬貫 睦州神泉二十五萬貫 鄂州寶泉二十萬貫 韶州永

通八十三萬貫 梧州元豐一十八萬貫 係鑄逐路支使錢等共一

百五十六萬貫詔少闕數及合用銅本令尚書省措置

仍差承議郎蘇茂提舉措置江淮荆浙福建廣南路銅

事長編 大觀元年蘭州新置銅監曰廣阜從王祖道奏

請也長編 大觀二年開封尹兼提舉京畿錢監宋喬年

言檢准近降朝旨諸路錢監見鑄大觀小平錢並依舊料例仍令崇寧監別鑄樣臣今勒崇寧東監工匠鑄到錫母五文足烏背銅樣錢五文足漉銅樣錢五文足紐計到逐等本錢內烏背錢五文足漉銅樣錢五文有零每人日鑄四百三十五文漉銅錢每貫九百六十三文有零每人日鑄七百一十六文官兵請給不在此數詔烏背赤仄工力稍大致虧戶部上供之數可以漉銅錢下諸路令依樣鑄

長編

宗初諸州鑄錢監惟韶之永平最古自唐乾元初已
本朝於至道中增池之永豐咸平中增江之廣寧而
又之鑄錢院大觀末始建兵興以來鼓鑄殊損而官吏
衆往往虛糜廩給是年始令永豐監卒寓役於虔蓋
少以就多也歷吏部郎中劉大中言鼓鑄為國利
虔饒兩司歲鑄一百五萬緡留四十五萬緡循環為
合發五十九萬餘緡而元年二年共止鑄二十萬緡
支外止發一十二萬緡却用銅本錢給兵匠總三十

一萬餘緡除實鑄外虛費一十九萬餘緡豈上所得償
費而已事下工部本部言江州廣寧監合鑄二十四
萬貫池州永豐監合鑄三十四萬貫比經殘破以兩監
一匠池併入饒江併入虔外其鑄額合令認發十二月
未詔從之歷紹興三十二年初諸路歲鑄銅錢一
日六十萬自紹興以來權以五十萬為額而虧額甚多
一及十萬一千貫紀事

孝宗乾道劄子言祖額認定初監共一百六十一萬七

千九百三十五貫八百文目今認定諸監權以三十萬
為額紹興三十二年分用坑錫銅鑄到錢一十萬四十
貫此額拖欠三十九萬六十貫乾道元年鑄到一十一
萬三十五百矣 淳熙五年陳亮奏嘗即永平監觀之
唐制歲鑄錢六萬耳國初增為七萬太平興國八年張
齊賢轉運使增其數至三十萬又增永豐監共鑄六十
四萬矣永平一監數增十倍則其他採鑄之利又可知也
此國朝錢監之條目也

太祖建隆三年勅如聞近日緣邊州府多從蕃部將錢出界枉錢銷鎔許人告捉不以多少並給與告人充賞其經歷地分應干係兵校並當重斷十貫已上處死會要

開寶元年九月詔曰舊禁銅錢無出化外乃聞沿邊

縱弛不復檢察自今五貫以下者抵罪有差五貫以上

其罪死

長編

開寶六年禁銅錢不得入蕃界及越江海

至化外

長編

太宗興國三年關防守吏謹視蕃商無得關出銅錢故

敢縱者罪之有差邊民商旅帶銅錢出漢界處死

會要

真宗祥符六年申禁廣州蕃漢商旅將帶銅錢過海

會要

徽宗大觀二年詔訪聞北人所行錢幣多用中國小平錢以木匣盛貯車乘般載及燕涿荒歉盜糴中國斛斗若因循不已則匱中國而實夷狄非計之善也諸路帥臣當務體同宜多方禁止如有違犯帥臣當行竄黜透漏官司於常法外重加軍法

高宗紹興中宣諭官言二廣郡透漏銅錢應帥臣監司

守倅巡捕當職官失察者乞比犯人減等坐罪

孝宗乾道六年詔淮南運司如船載錢實一文以上過界流配一貫以上不以官蔭並以軍法施行 淳熙八年中上曰朕以宰耕牛禁銅器及金翠等事刻之記事板每京尹初上輒示之

我祖宗禁銅錢之泄於外夷也

太祖建隆三年禁諸州鐵鑪錢及江南所鑄唐國通寶錢民間有者悉送官所在設棘圍以受之敢有藏隱許

人告重寘之法

長編

建隆三年夏詔奉使江南者毋得

將其國所用錢過江北

長編

太宗興國四年先禁銅錢不得入劔南界自今兩川民

許雜用銅鐵錢不得出他境

長編

我祖宗禁銅錢之過於外界也

太祖乾德五年詔有司言民間新小錢侵紊法制請州

輕小惡錢及鐵鑄錢限到一月內送官違者罪之有差

敢私鑄者棄市

會要

太宗興國二年詔訪聞民間多用新小錢自今銅錢須及四斤半以上方得行用其間有新小錢不及新定斤兩者限一月陳首納官據斤兩給銅價錢限外犯者罪之有差私鑄之人作法處死 興國九年又詔兩京諸

道申明舊禁

會要

雍熙元年八月有司言江南饒洪信

等州民多盜買官銅雜鉛錫鑄新錢請禁之壬辰詔江南諸州止得用舊錢官庫所鑄新錢每貫及四斤半者悉送闕下不及者銷毀之又以民間尚多惡錢復申乾

德五年之禁稍峻其法

長編

端拱元年内侍蕭延時使

嶺表以民間私鑄三等錢來上具言多與蠻人貿易侵敗其法因詔察民敢有私鑄及銷鎔好錢作薄惡者並棄市輒以新惡錢與蠻人博易者抵罪

會要

徽宗大觀元年知開封縣曹沔乞自今犯私鑄錢人依偽造符印法遇赦降特不原免巡捕官司故縱亦如之從之

孝宗淳熙九年臣寮劄子奏聞泉貨之乏公私所患議

者欲草銷鑄之弊而不知其致弊之由是以其弊終不能去臣近從江西一路切見人間多是沙毛蓋緣游民無賴之徒群聚山谷銷毀崇寧大錢之一模鑄沙毛二十毛錢脆薄易於破壞十數年來此錢甚行多是金銀鋪及諸色庫戶以見錢六百換易沙毛一貫私相貿易動以千萬緡計欲望廢斷行下江西諸路州軍應官司入納及諸色鋪庫戶交易並不得用沙毛重立賞格每費用及一文以上許人陳告將犯人準新錢法斷遣

如是則弊源既塞而銷鑄之患不期革而自革矣
我祖宗禁銅錢之流於薄惡也

太宗詔除佛像鐘磬銅鑑外民間銅器限一月悉送官
給價償之

會要

興國八年鹽鐵使王明言沿邊歲運銅

錢五千貫於靈州市馬七百里沙磧無郵傳冬夏少水
負擔者甚以為勞戎人得銅錢悉銷鑄為器郡國歲鑄
錢不能充其用望罷去自今只以布帛茶及他物市馬

從之

會要

真宗天禧元年三司奏僧人百姓收買官銅鑄鐘多接便召人施見錢拋入所鎔鐘內一處鑄造銷耗錢寶甚為非便欲望自今凡買銅鑄令逐處差官監守如將錢夾帶銷鎔許人陳告其鑄匠并捨錢人乞行嚴斷監官重行朝典從之

會要

仁宗天聖元年應銅鑄錢差官監守如以錢銷鎔許人陳告

高宗紹興中臣寮言民以錢十文將銅一兩鑄為器皿

可得百五十文民既輕於犯法矣而士大夫之愛奇者
百計收蓄羅列几席以為玩好乞嚴鉅鎔之禁

紹興三十八年上諭曰洪邁論鑄錢利害頗有可采前
後銅禁指揮非不嚴備而行之不嚴殆成虛文今若止
自公卿貴戚之家以身率之一切不用銅器然後申嚴
法禁宜毋不戢者有旨出御府千餘件付外銷毀有旨
士庶之家送納輸銅器并開具見任寄居官及形勢之
家所納過者并斤重職位姓名申省照會

孝宗淳熙十年臣寮劄子勘會昨降旨揮拘毀官司銅器禁銷錢寶前後措置斷罷條法旨揮非不嚴備然其間有許置造行用之物別無關防致民間藉以為奸十一月十九日奉聖旨將鐘磬銑鈎鈹許官司銅鑼并照子鈹作釘鉸錄鑄等今後亦不許鑄造仍委守令盡數根括鑄銅器之家拘收作具動使入官與免罷責令改業籍定姓名應民戶每五家為一保如有違犯保內不陳首並減正犯人一等科罪餘依前後禁約罪賞條法

指揮施行其僧道及士庶之家見有銅器許賣赴所在
州縣當官鐫鑒題記仍給憑由照驗如違依紹興二十
八年七月二十三日不送納入官者斷罷追賞內公私
必用之物官為製造給賞令工部條具申取朝廷指揮
此皆祖宗禁銅錢之銷於器用也

神宗朝王安石用政治罷銅禁奸民日銷錢為器邊防
海舶不復譏錢之出故中國錢日輕而西北三邊地皆
山積文定墓誌熙寧八年十月張方平又嘗論錢禁曰

臣伏以錢者國之重利日用之所急生民衣食之所資
有天下者以此制人事變立萬貨之本故錢者人君之
大權御世之神物也自熙寧七年頒行新敕刪去舊條
削除錢禁以此邊關重車而出海舶飽載而迴錢本中
國寶貨今乃與四夷共用又有廢龍銅禁民間銷毀無
復可辨銷鎔十錢得精銅一兩造作器物獲利五倍如
此逐州置鑪每鑪增課是猶吮澮之益而供尾閭之泄
也

長編

神宗嘗問公私錢幣皆虛錢之所以耗者其咎安在沈括曰錢之所以耗者八其不可救者二可救者五無足患者一生齒日繁水火削敗此不可救者二銅禁既開錢多為器鈔法數易富家不蓄鈔而蓄錢古為幣之物多而不專賴於錢今金銀為器而不為幣今若應輸錢者輸金銀則為幣之路廣錢利於流今至小之邑常平之蓄不减萬緡使流轉於天下何患錢之不多四夷皆仰中國之銅幣歲開出塞外者不貲錢泄於敵者不知

其幾何首當禁也此可以救者五河湟之間孤絕一隅
歲運中都之幣以實塞下而洮泯間治鐵為幣者又四
十萬緡歲積於三州之境物出於三州有窮異時粟斗
百錢今四五倍矣此錢多之為禍也今莫若泄之羗中
聽其私易以吾之滯積而得戰馬牛羊有用之物歲入
之芻粟遂減數倍之價所洩不過岷山之鐵耳此不足
為害者一也 張方平上疏比年公私上下並苦乏錢
又緣青苗助役之法農民皆變轉穀帛輸納見錢錢既

難得穀帛益賤人情窘迫謂之錢荒府庫例皆空虛人戶既無拘積不知歲所鑄錢今將安在

右臣僚奏議錢禁之疏也

以一當二則起於仁祖嘉祐罰俸之制 以一當三則起於仁祖慶歷陝西之法 以一當十則又起於臣僚奏疏之請

此上皆祖宗錢幣之大畧也

仁宗慶歷三年鄭戩請廢當十錢以一當三至今賴之

夏安期為河東轉運使民多盜鑄一當十錢乃興四監以復舊法

慶歷八年初陝西軍興移用不足知商州皮仲容

康定元年

十二月始獻議采洛南縣紅崖山號州青水治青銅置阜民

朱陽二監以鑄錢既而陝西都運使張奎

慶歷元年五月奎在陝西

都知永興軍范雍

慶歷元年五月雍知永興軍

請鑄大錢與小錢兼

行大錢一當小錢十奎等又請因晉州積鐵鑄小錢

元年

九月及奎徙河東

二年十月

又鑄大錢於晉澤二州亦以一當

十以助關中軍費未幾三司奏罷江東鑄鐵錢而陝西

復采儀州竹尖嶺黃銅置博濟監鑄大錢

據實錄在四年朝廷

因敕江南鑄大銅錢而江池號饒州又鑄小鐵錢悉輟

致關中

江池饒三州見元年十月號於未見當是范雍所議

數州錢雜行大約小

銅錢三可鑄當十大銅錢一以故民間盜鑄者衆錢文

大亂物價翔踴公私患之

長編

嘉祐四年以陝西民間多盜鑄大錢於是以見行當三

大錢折小銅錢二謂之折二錢

神宗熙寧四年皮公弼在陝西嘗建言陝西見行當二大銅錢頃歲西邊用兵始鑄當十錢後兵罷多盜鑄乃以當三猶私鑄乃減當二行之至今銅費相當民無冒利盜鑄衰息以舊銅鉛盡鑄當二錢從之其後折二錢遂行天下

長編

熙寧七年六月秦鳳路轉運司請於秦鳳翔府斜谷置監鑄折五折十錢乞降御書字樣詔准鑄折二錢熙寧九年壬辰三司言奉詔折二錢可且未得支用別聽指

揮前已詔諸路通行今未審止禁在京或令諸路並
罷上批都下錢法自祖宗以來未嘗有改其新行折
二錢不須取索比較利害宜直指揮京師并畿內並
罷先是薛向鑄折二錢於陝西其後許彥又鑄於廣
南以償銅價既而有言折二錢民或不肯折用又諸
路繼有如此者故始詔令府界不用後章惇乞并府
界用之上曰府界既用即當令京師亦用之至是有言
民以用折二錢不售訴於開封而後被決者又言有訴

三司者以故上批欲罷之及中書訪問開封府三司皆言無是事及再以進呈上又云但恐經久富民藏小錢莫出爾安石曰大錢亦無多富民豈肯藏小錢不出藏小錢不出於富民亦有何利上又曰恐四夷聞中國行兩等錢以為貧窘乃傷國體如何安石曰錢有二品自周已然何繫貧富且自古興王唐太宗周太宗時極貧然何足為耻臣初不欲鑄折二錢今乃極論者蓋朝廷舉動四方所瞻稍有罅隙即為奸人窺伺愚弄將不能

立國是又何能安天下國家也上乃令復行之然兩
宮訖不欲用折二錢故折二錢未嘗進入禁中

徽宗崇寧二年鑄大銅錢以一當十夾錫錢以一當三
民間盜鑄甚多於是罷之今則以一當三 崇寧三年
正月戊子罷鑄小平錢及當五錢並作當十大錢尚書
省勘會崇寧二年五月十三日已降朝旨令江池饒建
州將每年所鑄上供小平錢縮減萬數於每貫上增入
料例鑄當五大錢以聖宋通寶為文仍背鑄真書當五

二字及後來節次指揮并降陝西所鑄當十錢樣令依
做鑄造當五錢樣去訖今契會陝西路所鑄當十錢見
今行使遍於天下甚有利濟若將上件江池饒建州所
改上供當五大錢並依陝西見鑄當十錢樣制改鑄作
當十大錢不唯法制一體兼獲息愈多詔江池饒建州
將每年所鑄小平鑄錢一百三十二萬四百貫文料例
并崇寧元年八月十三日朝旨減到銅五十餘萬斤並
依陝西當十大錢樣制規模大小斤重次第改鑄當十

大錢依倣逐監鑄小平錢分數均勻分擘鑄當五大錢
前後已降朝旨並不施行 崇寧三年三月己丑江
淮荆浙福建制置發運司言宣德郎監舒州同安監熊
倩率先鑄成當十錢樣一千貫委有心力乞令帶本司
勾當公事遍詣諸州錢監措置督責鼓鑄起發上供從
之 崇寧三年丁未中書省勘會近已降朝旨復置徐
州寶豐監衛州黎陽監及令府界提點司於京城外西
壁權置錢監一所當二錢並改鑄作當十大錢緣陝西

見鑄當十條每貫用銅八斤白錫一斤六兩黑錫三斤
一十二兩自來所屬官司因循苟簡不切措置擘畫應
副今欲乞差文臣二員內一員往池州一員往饒建州
專切往來計會逐州知通并錢監監官細計合用銅錫
物料催促提點鑄錢司并本路轉運司多方措置應副
知通並五日一次入錢監官同共措置協力應副並從
之 崇寧三年尚書省言韶州岑水場在熙寧元豐間
歲收銅無慮六百萬斤除留充本州永通監鼓鑄應副

岑水場買銅外其餘盡輸嶺北諸監自元祐後永通監鼓鑄不敷買銅本錢遂至岑水場銅寢虧舊數嶺南嶺北諸監例多闕銅因此省廢數監今戶部與諸處調度艱窘理當措置勘會韶州永通監每年鼓鑄當二錢二十萬貫當小平錢四十萬貫并鑄小平錢四十三萬貫共係八十三萬貫內除三萬貫係買香藥外餘八十萬貫並專充應副岑水場買銅本錢今欲將上件見鑄當二錢並依舒州錢樣改鑄當十錢每貫合用銅八斤約

可鑄當十錢一十六萬五千餘貫計當小平錢一百六十五萬餘貫數內撥六萬貫敝小平錢六十萬貫貼本監舊鑄小平錢四十萬貫作一百萬貫充每年買銅本錢外猶有一十萬五千貫係剩數計當小平錢一百五萬貫崇寧元年十二月二十五日并崇寧二年四月六日嘗令江池饒惠四州每年添鑄錢共五十五萬並送內藏庫合用銅數令鑄錢司并銅事所措置應副自後並未見措置到數目深慮難以敷辦今欲將前項永通

監所鑄出剩當十錢一十萬五千貫計當小平錢一百
五萬貫盡數起發赴內藏庫內五十五萬貫代江池饒
惠州每年合鑄數外餘五十萬貫添助內藏庫支用數
目其江池饒惠州每年所添鑄錢指揮更不施行仍專
差宣義郎林虎與轉運鑄錢司官同共措置 崇寧四
年尚書省言崇寧監鑄御書當十錢每貫重一十四斤
七兩用銅九斤十兩二錢鉛四斤一十一兩六錢錫一
斤九兩二錢除火耗一斤五兩每錢重三錢十錢重三

兩詔頒樣於諸路仍令赤仄烏背字畫分明 措置韶
州鑄錢司言勘會諸監見鑄當十錢依陝西逐次申請
料例並破火耗外收熟重斤數本司契勘舊鑄當二錢
每貫省熟重二十斤令改鑄當十錢每貫銅鉛錫一十
五斤一十二兩除一斤五兩火耗外收熟重一十四斤
七兩即是合用當二錢一貫五百七十五文省方計重
一十五斤一十二兩改鑄當十錢一貫除火耗一斤五
兩外收熟重一十四斤七兩前收誤行修寫却作合用

當二錢二貫五百一十七文今欲乞申明行下諸路改正施行 崇寧四年九月乙未朔近鑄當十錢以權輕重而民愚無知冒利犯禁私鑄抵罪其已捕獲人可特與免罪仍免出納賞錢仰所在州軍並收充鑄錢戶倍加存恤依法給與官屋支物料不得減尅候鑄到錢限三日支給四分錢無令失所如該載不盡事件並依東南鐵錢已得指揮施行其未獲人展兩月赴官陳首准此收充鑄錢戶 崇寧四年尚書省言荆湖江浙私鑄

當十錢利重漸不能禁深慮民間物重錢濫乞荆湖南
北江南東西兩浙路並改作當五錢舊當二錢依舊又
慮冒法運入東北宜以江為界從之 崇寧五年詔近
降指揮鑄當十錢監並依舊改鑄小平錢所有先降指
揮計定工料分數內二分鑄當十錢指揮更不施行
崇寧五年中書省勘會已降指揮創置鑄當十錢詔所
有犯罪之人配填充上件錢監兵匠指揮更不施行
崇寧五年是春監察御史沈疇言臣聞小錢之便於民

間也久矣未有知其所由也古者軍興錫賞不繼或以
一當百或以一當千此權時之宜豈可行於太平無事
之日哉誰為當十之議不知事有召禍法有起奸游手
之民一切鼓鑄無故有數倍之息何憚而不為雖日斬
之其勢不可遏也往往鼓鑄不獨閭巷細民而多出於
富民士大夫之家曾未暮歲而東南之小錢盡矣錢輕
故物重物重則貧下之民愈困而飢寒之患此盜賊之
所由起也夫使民嗷嗷然日望朝廷改法此豈經久計

哉又有監司獻議欲盡改陝西鐵錢為夾錫錢者此尤不思之甚也殊不知有之以為利無之以為用以其無銅鑄故夾錫之為貴今一切改鑄則其非銅錢猶日前之鐵錢也今召私鑄於東南矣又將召私鑄於西北是教民犯法非朝廷之利也伏乞睿聰詳酌速賜寢罷則天下幸甚 崇寧五年五月壬辰朔丁酉右正言詹不遠進對因論當十錢上曰當十並行本以便民今却反為民害如此非卿有陳朕不知也便直欲改作當三亦

不難只遠方客人有積貨鉅萬以上者陡鑄之不無胥
怨否不遠曰陛下行法要改則草薙而禽獮之或留慮
哀矜耻一夫不獲欲且改從當五亦可上復慨然曰終
痛革 崇寧五年丁丑詔聞當十錢私錢甚多外路私
錢可計小平錢三文足 大觀元年詔河北昨鑄夾錫
當五錢其樣製大小類當十銅錢若或行用奸民趨利
染為銅色私作當十難以驗察宜改鑄當二自今可令
計備物料廣鑄當二以足一路之費 大觀元年詔曰

錢為國之利柄以方圓銖兩而寄富貴貧賤之權若為
衆庶所操則利柄失矣今淮浙福建官吏曠職縱奸弗
戢盜鑄公行有誤良民公然受弊其今監司相度以官
錢為樣垂之市肆告諭民戶有不如樣限一季投納官
以一償五限滿不納加罪一等仍以所納錢更鑄補還
出榜告諭使衆知之 大觀元年丙申詔東南依己降
分數指揮鑄小平錢崇寧監只鑄當十錢 大觀四年
詔錢與物同少則貴多則賤當十錢法行之方定鑄而

不絕源源而來數既多法隨而弊私鑄復興混殽無別其法必壞非長久之術舊鑄錢監並依舊額壯鼓鑄小平錢其後降旨揮改鑄當十錢數等並罷新置河東河北陝西諸監鼓鑄當十銅錢夾錫鐵錢可罷鑄當十銅錢仍尚書省取索如新邊無鐵炭不可鼓鑄去處相度減罷外有合存留者擬定將上取旨仍令開封府立法行下 大觀四年張商英言當十錢為害久矣舊小平錢有出門之禁故凡四方客旅之貨交易得錢者必太

平入中末鹽鈔收買告牒而餘錢又流布在市井行鋪故上下外交相利養自當十錢行以一夫而負八千則為小平八十千錢輕齎則告牒為滯為貨鹽鈔非得虛擡之息則不行臣今欲權借內庫并密院諸司應於封樁絹紬金銀并鹽鐵即下令折十餘錢盜鑄偽濫有害錢法限民間半年於所在送納每十貫支給銀絹一匹一兩限滿其錢更不行用俟錢入官擇其惡者鑄小平錢存其好者折三行使如此則錢法鈔法不相低昂

可以復舊其銀絹等止是權借半年以上候收到錢撥還
大觀四年張商英言臣按唐明皇開元中姚崇宋
璟為宰相出米十萬石收惡錢又以好錢三百文換惡
錢一千改鑄二銖四參錢昔之賢相救弊規畫計不出
此當十錢自唐以來為害甚明行之於今尤見窒礙蓋
小平錢出門有限有禁故四方客旅商貨交易得錢者
必入中末鹽鈔收買官誥度牒而餘錢又流布在街市
民間故官私内外交相利養自當十錢行一夫負八十

千小車載四百千錢既為輕齎之物則告牒難售鹽鈔非操虛錢而得實價則難行重輕之勢然也 大觀四

年張商英言臣昨奉聖旨元豐庫椿小平錢一千五百萬貫外餘聽出入以平錢鈔物三者之價臣不量力願任其責今欲先給鈔五百萬貫付陝西轉運司令分擘於五路沿邊收糴斛斗充代近裏州軍等第戶久來支移租賦之數却令近裏等第戶依數送納價錢假如每名支移歲費一百貫今三分損一以惠之則其利有三

京庫出鈔以飛當十錢其利一也以實鈔糴斛斗則商旅不擡虛價以合鈔面其利二也等第戶免支移陪費而鐵錢輸官以待移用其利三也臣既在此則須是遣一腹心人往計會孫琦筭密令通知供具五路每年支移若干斛斗於某州寨實計地里遠近民間每石并腳乘實出若干錢急速回報今踏逐得奉議郎桑景詢幹敏精悍有心力欲就差本人充陝西路轉運司幹當公事政和三年粹中出劄子論鑄錢司所鑄一年不敷

一月之數山澤之政隸屬虞部鼓鑄之利乃國計之本
有司謂朝廷必復鑄當十錢所以觀望言無銅不鑄小
平錢利源湮塞職事廢弛上愕然曰有司直敢爾當十
錢改為三尚且錢輕物重豈可復為當十自古利仄百
不變法利少害多不若不為粹中奏言江饒岑水場自
來不曾說無銅豈有蔡京才預政銅本便竭當十之行
盜鑄蜂起庚寅_{大觀四年}星赦緣錢法得罪者與除落罪名
陛下命刑部尚書白時中具依赦放免緣錢法罪罪人

數具到正犯及從坐者十餘萬人法之不善一至於此
改為當二而盜鑄者自息朝廷執此之令當堅如金石
觀望不鑄小平錢亦宜治其曠職之罪上謂曰卿只今
攜此劄子往都堂讀劄子未畢京以手撥去云無銅教
他如何做也粹中又言廣南鹽鐵數亦浩瀚五分歸鑄
錢司為本若只貢本錢亦是一季以上之數今本錢不
知何在京不答所奏不行此皆本朝折當之條令也

後魏高謙之上表請復鑄謂堯遭大水以歷山之金鑄

錢湯遭大旱以莊山之金鑄錢始自堯湯後世但言太公九府之法始殆未深攷也 錢文淳化九年二月宋

朝錢文宋元通寶太平興國後又鑄太平通寶是歲上

親書淳化元寶其文作草真行三體自後每改元每以

為文

通畧

國朝錢文皆書年號惟寶元以皇宋通寶蓋

慮有二寶字

歸田錄

錢陌首末

漢賈誼諫文帝曰民用錢郡國不同或用輕錢百加若干或用重錢平稱不受

漢志

應劭曰錢重四銖法錢百枚

當重一斤十六銖輕則以錢足之用重錢則平稱有餘不能受也師古曰若干目設數言之也臣瓚曰秦錢重半兩漢初鑄莢錢文帝更鑄四銖錢秦錢與莢錢皆當廢而故與四銖並行民一見其廢故用輕錢則百加若干用重錢則雖以一當六猶復不受之是以郡縣不同也

梁大同以後自破嶺以東八十為百名曰東錢江郢以上七十為百名曰西錢京師以九十為百名曰長錢大

通十一年天子乃詔通用足陌詔下而人不從錢所益少至於末年遂以往時緡錢出入皆以八十為陌後漢三司使王章減其出者三

五代史

唐昭宗天祐二年四月勅準向來事例每貫抽除外以八百五十文為貫每陌八十五文如閭坊市之中多以八十為陌更不除折今後委河南府指揮市肆交易並須以八十五文為陌不得更有不改移

會要

河南府以

八十文為百云

唐志

唐天祐中兵亂窘乏始令以八十五錢為百

後唐天成中又減五錢

漢乾祐初復減三錢

國朝因漢制其輸官亦用八十或八十五然諸州私用
猶各隨俗至有以四十八為百者丁酉詔所在悉用七
十七為百每千錢必及四斤半以上禁江南新小錢民
先有畜藏者悉令送官官據銅給其直通

太宗詔聞江南民多用新小錢自今所用銅錢每貫七

百七十陌須及四斤半以上方得行用

會要



羣書考索後集卷六十

欽定四庫全書

子部

羣書考索後集卷六十一至
三

詳校官中書臣寶汝翼

主事臣祁韻士覆勘

總校官知縣臣楊懋珩

校對官中書臣徐步雲

謄錄監生臣任銜萱

欽定四庫全書

羣書考索後集卷六十一

宋 章如愚 編

財用門

鐵錢

虞夏之時鑄鐵之貢載於書

漢武帝之世孔僅籠鹽鐵郡國置鹽鐵官 昭帝時賢

良文學之士願罷鹽鐵桑弘羊難以為足國安邊之本

不可廢 元帝雖罷而尋復後漢公孫述廢銅錢置鐵錢官百姓貨幣不行

梁武帝普通中罷銅冬鑄鐵錢而易得人皆私鑄及大同以後所在鐵錢遂如丘山物價騰貴交易者以車載錢不復計數而商旅姦詐之徒因之以求利矣

唐初銀銅鐵錫之冶一百六十八陝宣潤饒衢信五州鐵山五 憲宗元和中鐵二百七萬斤 宣宗裴休請復鹽鐵使以供國用增鐵山七十一歲率鐵五十三萬

二千斤

五代吳越主洪佐議鑄鐵錢其弟洪億言鑄鐵錢有八害乃止

宋朝慮銅錢之出蕃界故于沿邊之地如川如陝如淮

並用鐵錢興州有濟衆監

三萬九千

嘉州有豐遠監

四萬邛州

有惠民監

十二萬

岷州有鎮錢監

十二萬五千

此鐵錢之所

由立也

太宗太平興國二年樊若水言江南舊用鐵錢於民非

便望於鼎州饒州產銅處鑄錢即令諸州鐵錢為農器以給河北諸州流民之歸附者詔從之先是李煜據有江南之地國用窘乏建隆四年其大臣韓熙載請鑄每十錢即以鐵錢六權銅錢四而行至乾德開寶中遂不用銅錢十直鐵錢十及李煜歸朝鑄錢益無用至是復用錢民甚便之興國四年詔先禁銅錢不得入劔南界宜除之自今兩川民許雜用銅鐵錢其銅鐵即不得出他境邊郡諸疆界謹視之興國五年張諤言川陝

民鐵錢十直銅錢一輸租即十取二自平蜀失於裁制
物價滋長鐵錢彌賤舊夷人銅一斤給鐵錢二百望增
為千錢可以大獲因而鑄錢詔夷人銅一斤給鐵錢五
百從之興國七年詔諸州輸稅依舊止納鐵錢偽
蜀廣政中始鑄鐵錢每鐵錢一千兼以銅錢四百凡銀
一兩直錢千七百緡一疋直錢千二百而鐵工精好始
與銅相亂既平蜀沈倫等悉取銅錢上供及增鑄鐵錢
易民銅錢益買金銀裝發頗失裁制物價增長尋又禁

銅錢入川界鐵錢十乃直銅錢二至太平興國四年始開其禁令民輸租及權利每鐵錢十納銅錢一時銅錢已竭民甚苦之商賈爭以銅錢入川界與民互市每銅錢一得鐵錢十又四其明年轉運副使右贊善大夫張諤言舊市夷人銅斤給鐵錢二百望增為千錢可以大獲因復鑄銅錢民租當輸錢者許且令輸銀及絹候銅錢多即漸令輸之詔許市夷人銅斤止給錢五百然卒難得銅而轉運副使右補闕聶洙同轉運祕書丞范祥

皆言民樂輸銅錢前每歲遞增一分後十歲即全取銅錢詔從其請祥因以月俸所得銅錢市與民厚取其直於是增及三分民蕭然益苦之或剗剔佛像毀器用盜發古墓纔得銅錢四五坐罪者甚衆知益州工部郎中辛仲甫具言其弊乃詔使臣吳承勲馳傳至成都府審度利害仲甫集諸縣令佐問之或潛持兩端莫敢正言仲甫責之曰君等御前及第天子門生何得不為長久計反畏聶補闕范祕丞乎乃皆言其不便召聶泳范祥

及東川轉運使覃同轉運卜倫皆下御史獄泳覃杖脊配役將作監祥倫免為庶人覃倫亦以月俸銅錢市與民厚取其直故也 興國八年奚嶼言福建諸州少銅錢請於建州鑄大鐵錢從之以太平通寶為文與銅錢並行尋以不便廢之 興國九年詔川陝路舊許以鐵錢四百易銅錢一百今罷之先是西川轉運使劉度建議如此至是鹽鐵使明言官既換易即私下必更增添銅鐵錢遂至長起物價乞降估之諸物價錢各仰本處

檢會未使銅錢之時近年時估物價曉示指揮買賣之人不得違越若或減價一任隨時勅命纔行人心以泰能久曉示固是永便公私切知近來漸增物價乞申舊詔從之 淳化二年趙安易上言劔南東西川鐵錢甚賤物騰民困請如劉備時錢十當百事下集議李惟清言非便不從乃遣安易往川陝路鼓鑄歲終纔得三千餘貫衆議以為非罷之 咸平三年兩京左藏庫王允恭言川陝民田之稅皆輸銅錢之一今輸鐵錢之十且

民入田稅以一為十官失其九矣吏卒俸給增一為五
又失其四矣吏卒得用十復失其半矣且饒信之銅積
數千萬若運峽蜀俾夔益逐路各置監鼓鑄歲用均給
不及十日悉用銅錢矣義雖未用然自吏卒俸給始改
用鐵錢之十易銅錢之一 景德二年知益州張詠上
言受詔與轉運使黃觀同裁度嘉邛二州所鑄景德元
寶大鐵錢令依福州鐵錢每貫用鐵三十斤取二十五
斤八兩成直銅錢一小鐵錢十相兼行用甚便從之上已

並會
要

祥符六年益州路轉運使趙稹上言兩川大鐵

錢公私未便見管銅數頗多欲鑄成大銅錢一以當十

命三司相度利害以聞

會

祥符七年益州凌榮等請

鑄大鐵錢每貫重十二斤兩以一當其使舊錢亦仍舊

行用從之先是西川小鐵錢每十當一貿易甚便其後

別鑄大錢每貫重二十五斤每一當小錢之十三司言

有盜鎔大錢二十五斤範為器用鬻其直二十故盜鎔

者衆榮言錢輕則行者賁鐵少則鎔者自息故請改鑄

要 天禧五年鑄鐵錢有三監邛州曰惠民嘉州曰豐

遠興州曰濟衆益州雅州舊有監後廢之大錢貫重十

二斤十兩以準銅錢歲鑄總二十一萬餘貫銅錢行於

天下鐵錢止於川陝

長編

仁宗慶歷八年奎復奏晉澤洛三州及威勝軍

實錄云
在五年

日鑄小錢獨留用河東而河東鐵錢既行盜鑄錢

者獲利十之六錢輕貨重其患如陝西言者皆以為

不便知并州鄭戩

六年二月
戩知并州

請河東鐵錢且以二當銅

錢一行一年人以三當一或以五當一罷官爐日鑄但

行舊錢知澤州李昭遘

六年四月昭遘知澤州

亦言河東民燒石

灰家有橐冶之具盜鑄者莫可詰而契丹亦能鑄鐵錢

以易並邊銅錢而去所害尤盛

長編

翰林學士張方平

宋祁御史中丞楊察與三司使葉清臣先上陝西錢議

曰六月乙未關中用大錢本以縣官取利太多致奸人

盜鑄其用日輕比年以來皆虛高物估始增直於下終

取償於上縣官雖有折當之虛名乃受虧損之實害救

弊不先自損則法未易行請以江南儀商州大銅錢一
當小銅錢三又言奸人所以不鑄小鐵錢者以鑄大銅
錢得利厚而官不必禁若鑄大銅錢無利又將鑄小鐵
錢以亂法請以小鐵錢三當銅錢一既而又請七月河
東小鐵錢如陝西亦以三當一且罷官所置爐朝廷皆
施用其言自是奸人稍無利猶未能絕濫錢也其後詔
商州罷鑄青黃銅錢皇祐二年二月又令陝西大銅錢
大鐵錢曰一當二嘉祐四年二月盜鑄乃止然令數變

兵民耗于資用類多咨怨久之始定

長編

嘉祐四年詔

如聞陝西民間多濫鑄大錢以故市易不通其以見行

當三大鐵錢並當小鐵錢之二本路官員已支三月俸

者即計其數貼支

長編

先是議者欲變大鐵錢當一提

點刑獄陸詵言民間貴小銅錢而賤大鐵錢他日一當

三猶輕之今令與小錢均直則大錢必廢請以一當二

則公私所損無幾而商賈可以通行兼盜鑄計其物直

無贏則必自止而陝西舊藏饒州大錢闊緣民間久不

敢用今既無盜鑄則亦可以兼行四者皆便又言既更錢法前日民負官緡者法應如數追納望分蠲其一詔悉行之自是盜鑄乃止然人之數變兵民耗于資用類多咨怨久之始定

神宗熙寧八年永興軍等路轉見管私鐵錢轉運司九萬餘緡常平司十一萬餘緡并買民間私鐵錢數十萬斤並當改鑄省樣錢欲除永興軍河中陝西銅錢監添匠鼓鑄外更于商號洛南增置三監耀廊權置兩監共

九監鼓鑄永興廊耀河中陝去鐵冶遠第改鑄偽錢一
年可畢商州洛南華號最近鐵可以久行廊州等五處
候改鑄罷工匠併入商州等四監然後專鑄大錢從之
仍委皮公弼總制營辦先是安撫轉運司出榜收買四
等私錢一切禁斷舊通用錢而以銅錢易之以官庫見
管并換到通用私小錢重行鼓鑄而熊本以為如此則
公私未便乃下逐司申明前後條約唯揀缺薄漏貫字
樣不明等私錢犯者依法施行入官銷毀應自來通用

錢並令行使如故其官庫不堪用鐵等錢即別置錢監
增圓物料比省樣微如別異鑄熙寧重寶詔遂司具官
私合改錢數各計若干及如何措置以聞至是轉運司
條具來上故有是詔 熙寧八年三月丁酉詔秦鳳等
路都轉運司相度所鑄大鐵錢約補足所廢監錢數外
不須廣鑄委熊本總制營辦 岷州置鑄錢監令知熙
州高遵裕轉運副使張穆之提舉以遵裕言威遠監所
鑄折二錢用工少而得利多今岷州鐵冶暴發若增置

一監歲可得緡錢四十萬故命置監焉后賜監名曰焰
山 熙寧八年十二月是月復雲南軍雲安監置舒州
同安監京兆華耀陝州鑄錢監 熙寧九年四月永興
軍等路轉運使皮公弼言比者改鑄私錢悉為省樣盜
鑄屏迹人情少安今又許通使私錢恐盜鑄復起錢色
經久難辨詔三司指揮汪輔之所簡可用鐵錢未得通
行先具數以聞 熙寧九年七月丙子詔訪聞陝西自
罷監錢後軍民交易尚為兼并之家不肯以省樣鐵錢

與銅錢一般行使令兩路轉運司分明榜諭後如有所犯即行嚴斷仍令衆五日 熙寧九年九月中書言陝西官司所納不堪用私鑄錢百一十五萬九千八百餘緡初言止有二十餘萬緡一年可改鑄畢今其數乃如此又稱每年止鑄大錢九千一百五十餘緡其違法納私錢官司欲令三司依法施行從之 熙寧九年侍御史周尹言臣聞錢幣之用古者或謂之泉欲其流而無滯或謂之布取其周遍而平均臣去冬奉使經由永興

秦鳳路伏見盜鑄錢不少問其本末蓋是錢法用一當
二鐵錢易得而民間盜鑄者費少利倍又訪聞得所在
官中積貯者約有數百餘貫民間收藏者猶不在其數
緣上件錢貨起初原以一當十後來減為折三近歲又
作折二已于國家重貨十損其八若更作一文行用即
又損一分所以不敢輒有奏請昨來朝廷差汪輔之往
逐路揀選鐵錢萬數不多合三司指揮更不行用仍令
改鑄就令改鑄務監每一日鑄及三千貫即一年之內

除節假旬假實有三百日課程約只見九千萬貫以來計三二年間未滿數百萬貫況日課未必及三千貫之數也若改鑄之法或只仍舊作折三即民間私鑄定亦不可止絕臣欲望將折二鐵錢更不別行改鑄亦不須揀選起自今後只作一文行用則盜鑄者所獲之利不充所費自然無復冒禁作過歲重辟而農商省交易獲泉貨通流之利且約官中所有止就四百萬貫言之若以二為一即猶得二百萬貫之數致力簡省便可行用

六月 熙寧十年六月壬寅三司言鑄大錢欲乞但依舊

額今後如有添鑄乞除陝西河北河東外諸路並鑄小錢又言河北西路轉運司請于邢磁州置監鼓鑄折二錢十萬貫今相度欲於永興軍路鑄折二錢十萬貫却於河北西路添鑄大銅錢並從之 元豐元年八月乙

丑利州路轉運司言興州濟衆監每歲舊鑄錢四萬一千緡計支本錢二萬四千緡得息萬七十緡應副茶場司今若依脩宗閔奏請增鑄常使錢三萬一千緡通舊

鑄及額錢總七萬二千餘緡共支本錢四萬二千三百餘緡可得息錢三萬緡其宗閔所乞鑄一半大錢欲並鑄折二大錢不惟便於行用兼省工費得收息入茶場司足用及限一年撥還本錢從之仍令止鑄本路見使錢 元豐六年陝西轉運司言同州韓城縣山鐵礦盛苗脉深厚可置錢監及渭州華亭縣博濟監因循廢罷欲於黃石河鑄冶務復置監廢秦隴州鐵監從之 元豐七年京東路都轉運使吳處厚言徐州利國監鐵柔

良堪用乞置寶豐下監每歲除供給公使外鑄折二錢三十萬緡委請河輦運司以次附帶上京寄納却令三門輦運司具舟載至河中府因回脚鹽車入陝府轉移用度歲歲如此不為無助乞從臣相度條畫立法詔畫二合費用及自利國監至京脚直以聞今約鑄折二鐵錢二十萬緡當費用及至京師直計萬五千四十緡詔付戶部關工部並如居厚所奏

哲宗紹聖三年七月三省言陝西路比年鐵錢益輕鈔

價踴貴公私受弊詔度支郎中任公裕與都大提舉成都府利州陝西等路茶馬事陸師閔同本路轉運司相度措置講究利害先是上問於曾布曰陝西錢輕欲變法鄭雍欲給鈔安燾云只是富得百姓雍不曉布曰六貫鈔見賣十三貫正當給鈔以平鈔價鈔價減則鐵錢重鹽課增商旅行人不食貴鹽未見其不可與其欲減鐵錢以兩文當一公私坐耗其藏鏹之半未見其利百姓固欲其富何可使貧兼未見其但富百姓而有害於

公家因言燾素不曉事恐其言未必可取也上曰燾與張惇皆以為不可布曰但令條陳其不可之狀則利害可見矣上又曰錢法恐須變布曰此事體大臣不敢輕議鄭戩在河東變鐵錢以三當一當時人情極洶洶不安今日遽變坐耗公私之半必更沸騰臣未知的確利害不敢以為可變況今鈔沙已弊給鈔以救錢輕之患正是今日所宜雍之說恐可行爾

長編

徽宗大觀元年詔河北昨鑄夾錫當五錢其樣製大小

類當十銅錢若或行用姦民趨利染為銅色私作當十
難于驗察宜改鑄當二自今可令計備物料廣鑄當二
以足一路之費

長編夏四月

大觀元年詔曰錢為國之利

柄以方圓銖兩而寄富貴貧賤之權若為衆庶所操則
利柄失矣今淮浙福建官吏曠職縱姦弗戢盜鑄公行
有誤良民公然受弊其令監司相度以官錢為樣垂之
市肆告諭民戶有不如樣限一季投納官以一償五限
滿不納加罪一等仍以所納錢更鑄補還出榜告諭使

長知之

長編

大觀元年丙申詔東南依已降分數指揮

鑄小平錢崇寧監只鑄當十錢

長編九月

大觀二年御筆陝

西轉運判官張搏新進鑄錢錫鐵錢樣使錫少鐵多既多必暗與盜鑄者真偽難辨可只依舊鼓鑄不得裁減仍速行下御筆比以四川鐵錢猥多錢輕物重若更許陝西鐵錢入川行用則弊益以輕物益以貴非平價裕民之道其陝西鐵錢可更不許入川行用

長編

大觀四年春詔與物同少則貴多則賤當十錢法行之方定鑄

而不絕源源而來數既多法隨而弊私鑄復興混穀無別其法必壞非長久之術舊鑄錢監並依舊額止鼓鑄小平錢其后降指揮改鑄當十錢數等並罷新置河東河北陝西諸監鼓鑄當十銅錢夾錫鐵錢可罷鑄當十銅錢外仍尚書省取索如新監無鐵炭不可鼓鑄去處相度減罷外有合存留者擬定將上取旨仍令開封府立法行下

長編

大觀四年秋七月張商英言當十錢為

害久矣舊小平錢有出門之禁故凡四方客旅之貨交

易得錢者必大半入中求鹽鈔收買誥牒而餘錢又流布在市井行鋪故上下外交相利養自當十錢行以一夫而負八千則為小車八十千錢輕齎則告牒為滯為貨鹽鈔非得虛擡之息則不行臣今欲權借內庫并密院諸司應于封樁絹紬金銀并鹽鐵即下令折十餘錢盜鑄偽濫有害錢法限民間半年於所在送納每十貫支給銀絹一匹一兩限滿其錢更不行用候錢入官擇其惡者鑄小平錢存其好者折三行使如此則錢法

鈔法不相低昂可以復舊其銀絹等止是權借半年以

上候收到錢撥還

長編

大觀四年張商英言臣按唐明

皇開元中姚崇宋璟為宰相出米萬石收惡錢又以好錢三百文換惡錢一千改鑄二銖四參錢昔之賢相救弊規畫計不出此當十錢自唐以來為害甚明行之於今尤見窒礙監小平錢出門有限有禁故四方客旅商貨交易得錢者必入中末鹽鈔收買官誥度牒而餘錢又流布在街市民間故官私内外交相利養自當十錢行

一夫負八十千小車載四百千錢既為輕齎之物則告
牒難售鹽鈔非操虛錢而得實價則難行重輕之勢然
也

長編

大觀四年張商英言臣昨奉聖言元豐庫椿小

平錢一千五百萬貫外餘聽出入以平錢鈔物三者之
價臣不量力願任其責今欲先給鈔五百萬貫付陝西
轉運司令分劈於五路沿邊收糴斛斗充代近裏州軍
等第戶久來支移租賦之數却令近裏等第戶依數送
納價錢假如每名支移歲費一百貫今三分損一以惠

之則其利有三京庫出鈔以飛當十錢其利一也以實鈔糴斛斗則商旅不擡虛價以合鈔面其利二也等第戶免支移陪費而鐵錢輸官以待移用其利三也臣既任此則是遣一腹心人往計會孫琦等密令通知供具五路每年支移若干斛斗於某州塞實計地里遠近民間每石并脚乘實出若干錢急速回報今踏逐得奉議郎桑景詢幹敏精悍有心力欲就差本人充陝西路轉運司幹當公事

長編

政和四年庚辰陝西轉運司奏本

路見行使舊大鐵錢其錢係慶歷至和熙寧元豐元祐
紹聖元符聖宋字號者即見行使夾錫錢無上件年號
民間易為辨認不至疑惑外只有政和通寶一色錢與
政和通寶錫鐵錢文樣製相類致或夾帶般販混雜行
使申乞施行尚書省勘會夾錫錢諸路行使已各快便
唯是陝西路般販舊大鐵錢夾帶流傳入諸路與夾錫
錢混雜行使致害錢法欲自今降指揮到日其政和通
寶舊大鐵錢官私更不行使均撥赴逐錢監改鑄夾錫

錢民間仰限一季并齊赴逐處官司納換從之

長編

政

和五年乙卯奉議郎權提轄措置陝西路坑冶催促鑄錢兼措置川路坑冶蔣彛轉一官彛自言政和四年鐵錢五百三十七萬一千八百貫除支破物料及諸色糜費本錢外實收淨息錢三百七萬四千八百貫數及年額故也 政和五年庚寅臣僚上言政和元年已後夾錫錢嘗與舊鐵錢一等行使仍不得別稱呼政和二年朝廷興復鐵錢夾錫錢當銅錢二文而元初寄賣典質

之家往往相繼理索收贖歸還者謂當紐折理索者欲依
元數緣此紛紛爭訟不已當職官又各依違含糊不為
辨白止令在外詳議元稱鐵錢即令中半交還元稱錫
錢即令還錫錢元稱鐵錫錢方依今來見行錢法紐計
本路漕司約束自違錢法謂政和三年五月五日興復
錢法以錢典過產業地土今來收贖如元交錫錢自合
用錫錢收贖臣契勘鐵錫錢一等行使自錫與鐵錢不
異政和三年以後興復錢法錫錢當銅錢二文彼時此

時自有輕重今後收贖理當明白曉諭合依見行錢法施行從之

孝宗淳熙十一年十二月己卯進呈解元振奏乞令光州依舒州蘄州置監鑄鐵錢上曰此事難行后次鑄到鐵錢時可令分二三萬與光州 史臣曰弊多則錢益輕而物重況以鐵為幣又非銅比也鐵之價賤于銅而又多鑄焉其輕也必矣夫以事揆事則慮有遺策以理揆事則物無遜情雖事物之微而皆有以察其利害

之實神聖之明天下誦之為不可及矣

聖政

羣書考索後集卷六十一